

AKHBAR : SELANGORKINI

TARIKH : 22 SEPTEMBER 2021

KERATAN AKHBAR

Beza peranan LUAS, Air Selangor urus sumber air



Petugas Lembaga Urus Air Selangor (LUAS) memantau lembangan sungai selama 24 jam menjelang Aidilfitri bagi mengelak henti tugas loji rawatan air. Foto Facebook LUAS

LEMBAGA URUS AIR SELANGOR
(UNIT KORPORAT)

SHAH ALAM, 22 SEPT: Lembaga Urus Air Selangor (LUAS) dan Pengurusan Air Selangor Sdn Bhd (Air Selangor) merupakan dua entiti yang mengendalikan sumber air kepada pengguna di Lembah Klang.

Menerusi video ringkas yang disediakan LUAS, orang ramai diberi penerangan tentang fungsi dan peranan agensi Kerajaan Negeri itu.

“LUAS merupakan badan berkanun Kerajaan Negeri yang mengurus sumber air mentah yang merangkumi air permukaan seperti sungai serta kolam, air bumi dan perairan pantai tiga baru nautika dari darat ke laut.

“Peranannya menguruskan sumber air dari segi kualiti agar mematuhi piawaian kualiti air mentah yang disyorkan dan kuantitinya supaya cukup untuk dirawat sebagai bekalan air terawat oleh loji rawatan setiap masa.

“Manakala Air Selangor yang dahulunya dikenali sebagai Syabas adalah anak syarikat Kerajaan Negeri yang merawat air mentah kepada air terawat dan membekalkannya kepada pengguna di Selangor, Putrajaya dan Kuala Lumpur,” menurut audio selama 2 minit lebih itu.

Peranan LUAS:

1. Mengurus sumber air (air mentah) dari segi kualiti dan kuantiti
2. Pelesenan dan caj abstraksi sumber air
3. Pelesenan dan caj pelepasan atau kemasukan bahan pencemar ke sumber air
4. Kebenaran bertulis bagi aktiviti pengubahan sumber air
5. Pelesenan dan caj navigasi jalan air pedalaman
6. Pelesenan dan caj pelencongan sumber air bagi janakuasa elektrik

Peranan Air Selangor:

1. Merawat air mentah di loji rawatan air
2. Membekalkan air terawat kepada pengguna
3. Pembayaran bil air
4. Mengendalikan hal berkaitan gangguan bekalan air kepada pengguna
5. Kerja pembaikan paip pecah atau bocor
6. Pendaftaran dan penukaran nama akaun meter air

Tambahnya, orang ramai boleh menghubungi LUAS untuk melaporkan jika terdapat aktiviti mencurigakan yang berpotensi menyumbang kepada pencemaran sumber air.